

評曰：論道而笑，古人尚呵，今世諦談諧，捧腹無厭，丹霞見之，又當何如？

晚必涕泣

伊庵權禪師，用功甚銳，至晚必流涕曰，今日又只恁麼空過，未知來日工夫如何，師在眾，不與人交一言。

三年力行

晦堂心禪師，自言初入道，自恃甚易，逮見黃龍先師，退思日用，與理矛盾極多，遂力行之三年，祈寒溽暑，確志不移，方得事事如理。而今欬唾掉臂，也是祖師西來意。

圓枕警睡

詰侍者，睡以圓木為枕，小睡則枕轉，覺而復起，率以為常。或謂用心太

過，答云，我於般若緣分素薄，若不如此，恐為妄習所牽。

被雨不覺

全菴主，為道猛烈，無食息暇，一日倚欄看狗子話，雨來不覺，衣溼方知。

誓不展被

佛燈珣禪師，依佛鑒，隨眾咨請，邈無所入。歎曰：「此生若不徹證，誓不展被。」於是四十九日，只靠露柱立地，如喪考妣，乃得大悟。

擲書不顧

鐵面昂禪師行腳時，離鄉未久，聞受業一夕遺火，悉為煨燼，得書，擲之地曰：「徒亂人意耳。」